


玉琴集

兩江示稿



羽

玉華堂兩江示稿

爲條列勸諭事本署院恭蒙

簡命署督兩江察吏安民是其素志閱兵簡將亦其責成但下馬糾叅原非古道徐徐勸化方副

聖懷所有條款合亟臚列通曉爲此示仰闔屬官吏紳士兵民人等即便一體知悉

計開條款於後

一文官以教化士民保養地方元氣爲主武官以訓練兵馬鼓勇三軍氣節爲先若重耗貪賊徇私枉法沉擱案件濫

批佐雜縱兵虐民扣剋糧餉徇情拔補私役兵丁與夫貪  
緣結納用巧行私種種不公不法皆爲

國紀所不容天理所不容各該文武官弁亟宜漏夜三思徹  
底清查有則改之無則加勉

一仕途雖分文武爵秩雖有崇卑境土雖有畛域要皆同屬  
王土王臣事無大小地無彼此理應和衷協力若口是心非  
面譽背毀則公事尚未措舉私嫌早已相涉

國民兩誤徒勞無益各該文武大小官弁嗣後以和衷爲懷  
尤當以誠實居心庶幾本末交修形跡兩忘事有實濟勉

之望之

一下江乃奢華之地爲民上者當身先節儉以挽頽風若玩  
物喪志情隨景遷厚其口腹美其衣食炫竒鬪巧好戲貪  
華窮奢極慾與民爭馳不但官箴有玷將見身命莫保而  
尚望其移風易俗廻狂瀾于既倒不亦難乎各該文武大  
小官弁當思之戒之

一書役關防最宜嚴緊家人長隨並須約束大小文武衙門  
皆不乏隨任子弟親識幕客亦當共相體諒若任意出入  
恐滋物議有損官聲切勿忽畧

一保甲塘卡皆弭盜安民要務若縱役以保甲為魚肉需索  
陋規縱兵以行旅為利數勒要塘米及遇大奸積匪反置  
不見不聞為害最鉅嗣後文武官弁當留心察懲期于商  
民果有實濟至于私鑄私宰賭博邪教等類皆久經例禁  
最嚴者亦當不時督率訪拿勿蹈故縱之咎

一風俗以淳樸為上人心以誠實為主若尖巧奢華適足傾  
家戕命欽蒙

聖諭廣訓等書該管官弁不時宣讀講解凡紳士兵民務宜身體  
力行父子兄弟交相勸勉庶幾孝愈求孝忠愈求忠風俗

人心日益醇厚以副

聖天子教養蒸黎一道同風之盛意勉之勉之

一兵民同住一方即屬閭黨戚隣皆是

聖主赤子理宜彼此親睦交相和輯若士民以兵丁為孤注兵  
丁以士民為弱肉與夫兵給輕價民售假貨豈但構怨生  
嫌適足損已戕身自今以後凡紳士兵民務必和愈思和  
日久彌親同登禮讓之域勿失桑梓之雅勉之勉之

一士農工商各務執業營兵餘丁各勤操防但俱須盡以實  
心竭以實力期獲實用若著作邪書崇尚邪教游手好閑

闖街鬧館遇事生風造言編謠攬白用銅習拳弄棒以及劣衿肆橫衙役作惡地棍包訟兵丁逞強工商把持一切違條犯法之徒皆足累我端士良民而江南更有打降一流尤可痛惡自今各宜刻日改悔勤圖正業如再執迷不悟一經訪拿到案輕則問發寧古塔重則請旨處決市曹以靖地方

一棺骸暴露最可矜憫人死歸土原屬至愿若惑于風水妄貪吉穴停棺不舉幽寄荒郊既有暴露之慘更有水火之虞孝子慈孫豈所忍爲自今各宜作速依禮安埋以盡人事自然發福更不可占葬他人墳塋復起訟端其地方有暴露無主骸骨牧令自宜不時留心收瘞高立標記以聽認遷如地方有好義捐資購地代瘞之士民亦即舉報嘉獎切速切速

一江南僧道頗多各宜愈勉修行盡出家之道若干世法趨名趨利有污佛教其尼僧女冠亦當謹持三寶若遊蕩縱恣亦玷清規嗣後各自思量再有違犯定行嚴加究治以上十條各宜實心遵守實力奉行倘有藉此挾詐循良者亦干加等處治不恕

爲勸諭事照得蘇松常揚等府俗尚奢侈暴殄天物不知  
務本爭相逐末良可慨歎合行示勸爲此示仰諸色人等  
即便家傳戶曉士宜勤讀農宜勤耕商宜經營役宜奉法  
婦女守深閨紡織之箴家室敦孝敬和順之道遊山玩水  
乃越禮踰閑之陋習鬪巧炫竒實敗產戕身之毒藥亟宜  
醒悔以厚風俗特示

爲示查劣棍以培良善事照得江寧乃人文最盛之邦閉  
戶潛修謹守法度者比比皆然本署院叨制此地惟有率  
同屬僚加意作養以副

皇上重士愛民之聖心但恐其中偶有一二劣矜訟棍土豪逞  
肆不法累我端人良士甚至挾吏誑官莫彼誰何奸頑得  
志長此安窮是則必須盡法懲處庶宵小除而衆善愈興  
稂莠刈而嘉穀愈茂也合亟出示曉諭爲此示仰該

府官  
縣

吏留心察查如有此等不法之人該守令立即據實詳究  
以憑嚴拿究懲不得徇情姑縱亦不可偏聽陷誣各宜凜

五華堂兩江示稿  
導勿忽

為勸禁事照得江寧乃文獻之邦風俗有淳龐之象本署  
院蒞任此地惟有培養生儒愛惜民力曩聞蘇州婦女出  
遊之風最甚已經勸禁今聞江寧省城內外以及通津大  
鎮亦間有良家婦女每于春暖秋涼之時或坐船扛轎或  
結隊徒行遊山玩水謁廟看戲既費資財恐碍闡範從來  
士儒為兵民坊表合亟示諭端望爾等生儒善為明白開  
導兵民痛改前轍不得仍前縱容出遊爾兵民亦須聽從  
其言各肅家政本署院為風俗起見切勿忽視其衙役汛  
兵保甲鄰人等不得藉端察拿生事各宜凜遵特示

為勸諭事照得風俗以樸厚為尚人心以誠實為主訪聞江寧縉紳士庶之家遇有喪事則設樂開筵演戲結綵極盡紛華貧寒小戶因慮豐菲相形遂致停棺不舉又婚姻一事男家則爭論奩資女家則過索財禮罄家變產亦所忍為稍稍菲薄笑罵交加以致連簷比戶內有怨女外有曠夫雖經酌定婚喪規條日久仍復縱肆又如買賣貨物並不直言實價必定虛包折頭每兩則有八折九折不等不但欺人抑且欺己又戥秤升斗亦不畫一鄉農愚民嘗被欺混諸如此類各郡皆然省城尤甚風俗人心不啻江

河日下矣昔人云南京人多虛花此之謂也地方有司平時並不挽回良可慨歎合亟出示勸禁爲此示仰官吏紳士軍民人等知悉務期喪葬以禮毋得僭越停擱婚嫁以時毋得爭論愆期庶生死兩無遺憾至扛抬人夫聽憑各處雇用如馬頭之人強分地界硬索多錢許婚喪之家扭稟赴縣立即枷責勿恕其貨殖買賣必須公平切寔毋相欺詐虛浮爾紳士軍民當體本署院愛民之心實力改悔交相勸勉不得以出示爲虛文諸有司亦各勤加訓導不得以習俗所尚聽其自然有忝職守倘再執迷不悟本署院定以不孝不義之大法爲若輩繩之也慎之

爲曉諭事照得風俗之淳由于人心之正金陵爲名勝之區江左乃文物之地昨閱諸紳士勸贊普濟育嬰之舉人情古道不負名邦本署院濫叨

重寄實藉多賢然自捧

節以來業已匝月風聞賢士十居八九間有一二尚未脫俗匪獨深宅窩賭誘悞少年子弟且云不安本分事涉官常又有本非正派僭位紳衿行止卑污招搖詐騙肆行無忌凌弱欺孤本署院雖訪有其人實非一懲足蔽其辜合行招告按律嚴究庶一掃肅清使名邦勝地盡賢人而無匪輩

三聖堂  
矣其他爲富不仁如管姓蔡姓等人之滾債剝民爲惡不  
俊喇子狂徒之怪誕悖悍並不改轍亦當按名杖斃決不  
姑寬合行出示爲此示仰督屬人等知悉凡有受冤切骨  
受害破家者許即赴轅控告以伸不白之苦其他細事微  
嫌毋得妄控自取其咎特示

爲曉諭事照得移風易俗古昔云難然民風由于士習革  
面還須革心本署院承乏以來首推學校蓋江南乃文物  
之區金陵又坐鎮之地統于觀風之後勤評月旦振拔名  
儒然風雲月露之奇兼之玉海金山之望方稱大器不逐  
王楊匝月搜求尚無灼據慮失正僞少緩品題所聞黃程  
盧童等儒鵠峙鸞停可風一郡姑待核實另行獎勵又如  
謝周鄒鮑胡蕭裴姓等人招搖攬事名玷文壇亦候核實  
或被告發嚴拿重懲固我名疆合先勸誡以期易轍爲此  
示仰三學士子知悉立品者益加立品失教者速行學步

尊我諄誨一道同風將見秦淮渡口彬彬大雅倚天拔地  
之才盡是人中騏驥吳越文人望風法效本署院實有大  
望于諸儒矣特示

為嚴禁事訪聞江寧育嬰堂內竟成藏垢納污之所無依  
地棍潛身棲宿串通乳婦扣剋嬰糧暗飽私囊致使民間  
無告嬰孩寧忍拋棄不願送往殊堪痛恨合行出示嚴禁  
為此示仰司堂官吏及地保人等知悉倘有前項無知棍  
徒槩行驅逐毋再任聽滋擾干咎特示

王華堂內以示  
為特示勸諭事照得移風易俗首重天倫水旱凶荒全由  
人事欽蒙

聖主天恩教養黎元至周極渥特頒

聖諭廣訓內載

敦孝弟以重人倫

篤宗族以昭雍睦

和鄉黨以息爭訟

重農桑以足衣食

尚節儉以惜財用

隆學校以端士習

黜異端以崇正學

講法律以儆愚頑

明禮讓以厚風俗

務本業以定民志

訓子弟以禁非爲

息誣告以全善良

誠匿逃以免株連

完錢糧以省催科

聯保甲以弭盜賊

解讐忿以重身命一十六條條分縷晰剴切講解原欲使中外

紳士兵民身體力行迄今普天率土無不道一風同茲本

署院叨任兩江時已兩月日覩上江風氣亦覺淳厚而下

江諸郡大相懸殊然江寧士民猶覺可觀蘇州則浮詐居

多松常鎮淮揚徐太海通等府州屬士民人等淳良者固

不乏人其不肖者實繁有徒不特詐僞邪污窮工極巧甚

至父子夫婦之倫幾至褻瀆子媳翁姑之節亦多侮慢本

署院即就現在發覺案件披閱之下且歎且憤秉筆之頃

亦不忍言此一帶地方歷年收成歉薄近又兩被潮災大  
都皆由此等惡風薄俗上干

天和所致今既疊蒙

上天明示鑒戒凡爾士民人等何可冥頑不靈尚無悛改既負

聖主教養深恩又喪自己身心性命多士諸民何竟愚之至此  
合亟特示勸諭為此示仰諸色人等知悉即將

聖諭廣訓家傳戶誦朝夕講解實心遵守身體力行父子兄弟交  
相勸勉里隣族黨共加砥礪妻女子媳謹守閨門孝事公  
姑各盡婦道如此捫心自問急早回頭返樸還淳革薄從

忠自可上感

天和佇見時和年豐常書大有家家衣食豐足戶戶災患不生熙  
熙皞皞共享

聖朝昇平之福切勿視為具文徒負諄諄告誡之一番苦心也  
體之勿忽

為再嚴緝盜之令特示自首之條以靖地方以全民命事  
照得士農工商守法為要文武兵捕弭盜為先本署院下  
車以來仰體

聖慈條教檄飭不啻頽禿隨事切責至再至三乃日逐披閱案牘各屬報盜報竊絡繹接踵竟無虛時更聞外來盜匪市鎮尤多在爾營縣兵捕參縱固取罪戾踈懈亦干叅處爾等為強為竊之人剽竊村庄搶掠商旅

國法昭然更難寬假一經密訪搜拿行強者必皆梟首藁竿行竊者亦干絞流徒杖况積匪又有充軍之例人多現定

加等之條即摸攫些微偶爾初犯均面刺竊賊字跡人人  
目爲匪徒鄉黨視爲敗類墮悞終身幾難振拔若夫轉入  
強夥更必俱陷刑戮試看世間有曾犯案之盜賊可能倖  
逃法網乎合再出示通曉爲此示仰督屬官弁軍民人等  
知悉此示之後凡文武官弁務須上緊督緝兵丁捕快更  
宜用心躡拿水陸塘卡加意盤詰山村僻地極力搜查地  
勿分于鄰境盜無分于強竊一有確贓實蹟許即徑拿解  
究其積窩引線更宜密訪拿解務期案案全獲根株永淨  
定予嘉獎倘再因循姑縱前案未獲新案復起經本署院

另差訪拿定行特叅提究決不稍寬一線凡屬巨盜竊匪  
當知此番督緝斷斷不使再能逃脫苟延歲月或本身抱  
贓出首或親屬擒縛首解本署院自當原其情事量准減  
等免罪予以自新爾保甲族隣亦須詳細稽查孰爲外匪  
窩線孰爲本地積猾早赴地方官舉報重則擬斬輕亦充  
發併將若輩子孫押逐遠方以免貽害良善倘再畏縮定  
干連坐爾兵捕保甲亦不可捏誣妄拿復生事端至於犯  
案發落現已改悔者更當革面革心其偶然貧乏之輩當  
知安命守分雖無田產傭工尚可度日雖少膂力學藝亦

五華堂兩江司和  
可謀生即領賑行乞亦屬正路凜畏法紀咸爲良民凡我  
士庶更須不時勸誡使知勉勵以靖地方是所深望

爲飭禁事照得設官分職各當盡力辦公方稱無忝不得  
聽信家人役卒致滋弊竇本署院訪得文武屬員內如司  
道府廳州縣亦有坐省家人各營將備亦設有提塘名色  
俱潛住省城窺探打聽每多藉端招搖應即嚴拿究治姑  
從寬驅逐除飭知各該衙門遵照外合行示禁爲此示仰  
文武各官軍民人等知悉一體凜遵嗣後如有前項棍徒  
潛住省城僧房道舍飯舖歇家該方保甲人等立即赴地  
方官稟知拿解以憑重處如敢徇隱容留一經察出併究  
不貸

為嚴禁事照得各營馬匹日給草料自應收槽喂養放青之時亦當在于應牧之場所牧放近有旗馬踐食民田已經懲處追賠并咨

江寧將軍嚴飭八旗永禁外但恐本標兩營及江寧協營兵丁均敢縱放擾民亦未可定合併嚴禁為此示仰標協各營官兵知悉嗣後務各恪遵軍紀不得仍將馬匹在民間田地草場牧放踐食以恤農民如敢故違一經訪聞或被告發定以軍法從事決不姑貸慎之切切

爲嚴禁事照得本署院考拔武職人員俱係一秉至公親  
加較閱以慎遴選恐有不法棍徒招搖撞歲指稱打點夤  
緣及衙役人等需索陋規合亟示禁爲此示仰督屬官弁  
兵丁知悉嗣後倘有前項不法情弊立即稟報以憑嚴拿  
盡法處治如敢隱忍一經察出併究不貸特示

爲嚴禁差擾事訪得兩江州縣以及佐雜等衙門動輒出  
票差役一正兩副轎馬成行先索腳費酒資次講規禮票  
錢原被既已遂慾再向隣証索要鐵鍊張威群蠹助勢良  
懦受累不堪鷄犬爲之不寧牧令典巡忍心靜聽而司道  
府廳差役之下州縣亦先討官禮次勒經承上下交相詐  
索總皆出自吾民膏血言念之下深堪痛憾除現在拿究  
外合行通飭嚴禁爲此仰司道官吏即便轉飭所屬遵照嗣  
後一概不得濫差其錢糧遵用滾單滾催詞訟可用紙皂  
行拘案件止用行牌催督或發硃簽嚴飭有萬不得已必

須差役者當慎選妥人捐給盤費倘再有絲毫需索即行  
枷責如再縱容官則嚴叅役拿處死凜之慎之等因除檄  
飭外合併示諭士庶人等知悉如再有差役需索擾累許  
即赴道府喊控究報特示

示爾官民人等凡完納錢糧火耗加一聽民自封投櫃銀  
匠每傾銀一錠給火錢五文櫃書每給票一張付票錢三  
文如小制錢各照折增給此外如有絲毫加派立將州縣  
叅提治罪若銀匠低估成色櫃書重秤措票以及戶書圖  
書里差人等暗索規費私打抽豐種種婪贓累民定即一  
併鎖拿處死特示實貼櫃所

爲嚴示申禁事照得吏治賢否關乎民生休戚當今

聖明在上各省無不大法小廉獨兩江諸屬貪蠹成風至今並

不悛改而乘機巧取尤屬出人意料本署院向有風聞尚

恐傳言未確今自赴任經臨及連日披閱案牘如各屬徵

收錢糧在在俱有陋弊各營考拔弁兵大率皆徇情面又

如荆溪縣驗屍改傷婁縣縱役詐索又巡檢故縱捏報滄

涓之船戶把總縱放已獲之匪犯及報命報盜修船開河

糧餉齟政一切案件殊覺皆有可疑其司胥則大膽侵收

餉銅混點批廻幸賴該司即時察出若道府州縣正佐等

衙門胥役包侵錢糧盈千累萬以及生事擾民種種惡蹟  
各官更有代為庇護者回憶前言竟屬左券似此不公不  
法本署院若不急力整頓剔除豈不負

國悞民除現在確察叅究外合再嚴示申禁為此示仰官吏  
軍民人等知悉示後各宜捫心自問爭自濯磨循良者愈  
加奮勉不肖者急早回頭諸事一秉至公賸賄纖塵莫染  
衙門書役更宜稽察約束倘再執迷不悟定行嚴叅治罪  
決不以一己之清操徇多奸之利網慎之

為通示嚴革圖書冊書里書區書里差地差坐差副差以  
清錢糧以除民累事訪得兩江州縣有圖書冊書里書區  
書更有里差地差坐差副差虎踞都圖各掌一方與戶房  
經承表裏為奸內外勾通從前積欠數百餘萬皆係若輩  
包收烹分現今又有上元縣書役包侵蘆課南減二萬有  
奇績溪縣冊書派繳陋規數百餘兩俱已發覺叅究則向  
日屢革屢充牢不可破皆由不肖州縣留以派歛行私且  
聞圖冊書里書區書係將底冊藏匿私家每年攢造實徵  
沿鄉歛收冊費民間置產私立推單既索買主承糧規禮

又勒賣主脫稅謝儀更有移山過井平空栽稅掛稅夾板  
重樓疊閣飛洒等弊投冊之後卽回都圖凡遇戶婚田土  
命盜賭博等事伊俱出頭呈報居間詐索父死子頂兄終  
弟及至里差地差坐差副差係于開徵之先各認都區賭  
求冊票論地方豐歉錢糧多寡定幹票錢之盈縮印票入  
手一種無賴白役又轉相分買群蠹惡黨四散鄉都脚費  
酒資規儀抽豐種種索取不一而足舊票將銷又幹新票  
到手長年掌握與冊書人等同腔合板百般哄唬以致小  
民聽其包收不敢違拗受其擾累不敢聲張蠹

國殃民甚于狼虎若再因循姑縱貽患有何底止合亟通示  
嚴革爲此示仰督屬官吏人等卽將前項積蠹書差概行  
革除冊籍舊票悉行追存官署戶房可以經理者卽令戶  
房經理或賦稅繁重必須另設端管實徵推收過割之役  
亦另募殷實淳良之輩令其常在衙門伺候稍有弊竇卽  
行革懲防微杜漸民間置產務將應納銀米數目于契內  
填明上稅之時卽一面印契一面令于實徵冊內照契內  
銀米過割清楚登註明白次年再造實徵則竟開買主戶  
名將舊戶及已賣之粮抹除戶書經管完欠亦須嚴加攷

察至地丁南漕等項銀米開徵期屆州縣遵用滾單開明  
花戶應納銀米確數分發滾催各官若能明白開導並無  
重耗私派民間自必踴躍輸將間有頑戶抗欠然後摘拘  
比追法因人施權自官出不得仍前濫差縱役需索造冊  
與滾單紙筆飯食州縣酌量籌給不得派及里民其已革  
書差仍逐名押取連環的保如原管錢糧不清底冊不全  
或弄巧阻撓即行嚴拿監比詳究立提處死仍着于署前  
高立石碑刊明永革圖書冊書里書區書里差地差坐差  
副差字樣再有違犯官叅役斃先具碑摹呈閱

等因除出示曉諭外合併行知為此

牌仰 司道府州 即便

轉飭遵照仍不時嚴加稽察倘有陽奉陰違因循故縱立  
即詳報以憑叅拿究處并將發來告示

道分發所屬

州縣衛所 各場

并照抄多張遍行曉諭先取具所屬禁革碑摹

由司彙送查考毋違

為申嚴賭具之禁以安民業事照得紙牌骨骰一切賭具  
向係蘇郡出產或本地游手好閑之人私買賭博或外來  
愍不畏法之徒販買貨賣從前屢奉嚴禁地方各官並不  
實力於城鄉僻壤深巷古廟徧緝以致賭具至今不能盡  
燬而賭博不能止息流害無窮深可痛恨除現在密行察  
訪拿究外合行出示嚴禁為此示仰蘇州府屬軍民人等  
知悉嗣後務須各務正業毋得仍前暗地私造紙牌骨骰  
併一切賭具販賣倘有製造之家統限半月內將一切刻  
板牌骰以及傢伙等物并各小販存留未盡紙牌骰子俱

三華堂內以示和  
准自首送官銷燬免其治罪倘民不改悔官不覺察一經  
本署院訪拿或被告發除造賣賭具之人照例從重治罪  
及容隱之該地保甲併拿重處外定將該管地方官以溺  
職叅處決不寬貸各宜凜遵毋貽後悔

為嚴禁事照得江甘三汊河起至儀徵清江頭閘口止一  
帶河道今屆大挑儀真縣止請加倍撈淺江甘三縣則請  
依例大挑但工費實止需銀四千三百餘兩較往年減去  
一半誠恐二縣官役不按商三民七之例不照減定之數  
混行多派以及三縣承浚各官機乘限期迫促草率侵冒  
均未可定合亟出示嚴禁為此示仰三縣官役及各河員  
人等知悉務將往年積弊痛加洗除各自依實派浚上緊  
僱工以期商民無擾漕鹽重運無阻一勞永逸定予嘉獎  
倘限期已滿工未用完亦須截數報銷存俟下年再挑以

免重派商民如敢再有絲毫濫派冒侵本署院現在密察  
一經叅拿治罪後悔無及也慎之

為嚴禁事照得江寧省會之區商賈往來如織訪聞擺渡  
不法船戶任意多裝肆行勒索甚至於風濤洶湧之時停  
棹江心指取錢文地方官亦不查禁誠堪痛恨合行出示  
曉諭嚴禁為此示仰擺江船戶埠頭人等知悉出示之後  
倘有違例多裝任意勒索江心停棹取錢不顧民命致阻  
行旅者許過客人等立即扭稟該地方官轉報以憑盡法  
重處特示

為勸諭事照得各營兵丁月給糧餉以資養膳俾內外無  
憂盡心操練保衛地方今日之精兵即將來之良將豈容  
奢費虛華以取窮困今見各兵丁多有身穿緞袍緞靴綾  
襪緞鞋者試問爾等父母妻子果皆有粗衣飽飯不饑不  
寒否若只圖一身華飾於汝安乎合行出示勸勉為此示  
仰各營將備弁兵知悉嗣後馬兵姑許間穿青緞外褂亦  
不許過奢其步守等兵只宜着布槩不得爭尚服飾節省  
之資堪作一家飽煖之用則可盡心技藝用意弓馬竭力  
巡防本署院考驗時如果材技優嫻自當拔擢以示鼓勵

王華堂兩江示稿  
該將備等亦自宜節儉時時勸諭毋忽特示

為曉諭事照得私徵濫派疊奉

諭旨嚴禁本署院到任訪聞上江兩縣藉裁留戶圖冊費更夫等項名色仍各存銀四百九十八兩復又混派多收殊堪髮指若不一概革除終屬滋蔓且支更等夫可于衙役民壯內派用戶圖冊費可于縣官養廉內捐賞業經行司議詳批令將裁留貼費掃數永革勒石在案所有上元縣輪年漕米二千四百餘石每石費銀二錢零江寧縣輪年漕米二千七百餘石每石費銀一錢八分零一概全行革除嗣後通縣花戶俱止各完正供錢糧不得復完貼費從前

十年輪差名色一併永行銷除切勿受人愚弄自損脂膏  
合行出示曉諭爲此示仰上江二縣官役花戶人等知悉  
自示之後如有藉稱輪差貼費或又巧立別項名色派  
歛民間分文者許受害之人赴轅喊控以憑官叅役處各  
宜凜遵特示

爲嚴行申禁事本署院深荷

聖恩總制三省其於

國計民生人心風俗留意經理早夜未嘗去懷今又聞有江  
寧省城急務三條合再臚列曉諭各宜凜遵勿忽

一江寧省會烟戶殷繁食鹽在所必需近來鹽價每多高擡  
况今醃菜之期已屆該商須預爲多運平賣毋得高價病  
民該商販鋪戶人等如敢藉稱場灶歉薄故意高擡立拿  
枷示不貸

一江寧省城四方貨物聚集自應隨時銷賣乃有各行鋪戶

動輒挨戶傳知公立議單刷印遍貼街市糾錢演戲名曰齊行使物價高昂重取民利如私行賤售即公同罰戲實爲惡俗自今一概禁止倘敢再犯該地方官即行嚴拿分別究處

一江南省會競尚奢華每多越分捐考州同職銜竟僭戴水晶帽頂更有妄戴藍頂者又士民之家孩童方至五七歲公然擅戴鍍金帽頂者均屬違制嗣後各宜安分毋得妄自奢越倘有再犯地方官查明詳究

以上三條各速改轍如執迷不悟後悔無及亦不許胥役地棍人等藉端索詐並干重究特示

為嚴禁騷擾以肅郵政事照得驛遞夫馬多索濫應均干  
嚴例乃各衙門家人員弁書役動輒濫騎驛馬更有需索  
酒飯叱詈驛官鞭撻驛卒跑傷馬匹者在驛官驛卒見係  
上司衙門員役只得隱忍應付而上司官員因有此種短  
處故遇驛官疲缺馬匹遲悞大差攔延公文亦只得曲為  
狗隱上下相蒙驛遞日見廢弛合亟示禁為此示仰該縣  
驛官役人等知悉嗣後如仍有濫騎多索馬匹酒飯及勒  
要捐騾并叱詈鞭撻等情該驛即行飛報以憑嚴拿重懲  
毋得隱忍濫應其緊要差使公文亦不得故意推延併干

察究未便

為嚴行申禁事本署院深荷

聖恩總制三省其于

國計民生人心風俗留意經理早夜未嘗去懷今聞揚城積  
弊五條地方各官漫無察禁合行臚列曉諭各宜凜遵毋  
忽

一健訟亟宜整飭也江甘二縣士民每遇田土細故輒興訟  
端以強求勝殊可痛恨嗣後務須息訟守己若事非切膚  
頻涉公庭定行拿究

一喪禮亟宜改正也揚州習俗凡遇親喪設宴戲劇名為伴

夜親歿之夕孝子與期功之親咸捧壺觴楮帛至土地廟焚獻以求寬械弛扭輕刑薄杖甚屬怪誕更有婦死不殮必邀婦之父母兄弟親視然後釘棺父母兄弟遂即藉此勒索身屍發變此等惡俗良可惋嘆嗣後務各痛改前轍以厚風俗倘敢仍不改悔定行拿究不貸

一火債亟宜嚴禁也富室通財貧民出息原係緩急相通揚州地方有一班惡棍或將壞賤貨物加倍高抬或將低色潮銀先則八折七折還銀取利又有加二加三愆期則轉頭換券利上起利稍有拂意即云虧欠客本鳴官比責種

種火債不可枚舉嗣後那借通融只許每兩二分行息至重不過三分不得仍前將貨物抬價賒放重利剝民借銀之人亦不得藉端賴騙有虧血本各宜凜遵

一假銀亟宜嚴禁也揚州地當孔道商賈輻輳有種不法棍徒深藏密室製造假銀有灌鉛梅色擦白白爪雞諸名色不等在市行使鄉民小販携物赴售莫覓蠅頭以為舉家糊口之計若稍不留心一經售下即貽害無窮深堪痛恨嗣後該管地方官務須不時嚴加查察將不法棍徒鎖拿詳報盡法究處不得輕貸

一畧誘人口窩頓娼妓刮棍打降亟宜嚴禁也揚城居民稠  
密奸良各別有一等不法奸媒勾通外來拐棍簧言巧語  
假以娶妻妾買童婢為名將良家婦女子弟賤價貨去載  
至他方轉易重貨不顧婦女子弟流落何底又一等不法  
棍徒或包佔本地土娼或窩頓外來流妓引誘少年往來  
其家彼則于中覓食賺錢稍不滿慾肆行訛詐又有一等  
無賴光棍名為游刮一人偶有鼠角微嫌衆人群相附和  
呼朋引類三五成群帮扛打降逞兇撒潑縱到官枷責若  
輩視為泛常維揚流弊不能盡述嗣後務各改悔歛跡不  
得仍然橫行倘再有犯地方官即行嚴拿究擬不得稍存  
姑息

以上五條各宜惕除如執迷不悟一經訪拿後悔無及慎之  
慎之特示

為嚴示勸禁事照得耕牛為鄉農稼穡之本驢騾為負重  
致遠之資均不得恣意宰殺貨賣今查省城重地多有不  
法棍徒私宰牛隻而宰賣驢騾者更復不少地方各官漫  
無整飭合行出示勸禁為此示仰軍民人等知悉嗣後各  
宜守法痛改毋得私宰耕牛其驢騾亦不可宰剝貨賣再  
犯定行嚴拿重究決不姑貸至衙役地棍不得藉端訛詐  
慎之凜之特示

爲曉諭事照得江寧省城地方遼濶水道未通向雖疏浚  
猶多間隔本署院爲民生利病攸關特行委員勘估將各  
處官溝動項挑浚其官溝已爲民房壓蓋者亦令委員察  
看的實方行一例動項揭挖疏通不過片時那動並不遷  
拆民房倘豪強生端阻撓或將宅內私溝混作官溝冒請  
庫項定行嚴拿枷示委員估修不實亦必重加叅處至民  
房以內由後通前或由前至後一切出水私溝或通或塞  
本家不難試驗凡紳士兵民亦當乘此春融各自募匠出  
力逐細挖挑洗刷務須渣滓無存一直深通庶家家之水

俱得流入官溝官溝之水咸可直達外河其原係通水池塘被地棍霸佔裁荷養魚將兩頭高築堤埂致溝水不能消洩暢流者俱着自行開挖流通如仍霸佔堵塞延挨自利併于拿究不恕附近居民亦不得因此爭鬪生事本署院深恐差役滋擾故特徧示勸諭須各實心努力踴躍爭先勿使尺寸間隔務期一勞永逸自茲以往匪特積雨易消不致濕蒸成病抑且水道既通火患或可潛除體之遵之特示

為嚴行申禁事本署院深荷

聖恩總制三省其于

國計民生人心風俗留意經理早夜未嘗去懷今聞蘇城積弊五條地方各官漫無察禁合行臚列曉諭各宜凜遵毋忽

一承值當差之派舖戶里民宜禁也蘇城長元吳三縣經承凡遇

欽差駐劄上司往來或逢觀風莫不出票協同地方指稱借備桌檯床張棕簟毡單花卉掛燈馬槽等項一切應用傢伙

任意橫索強拿或派之行舖或取之里民倘有什物付彼藏匿不還終歸烏有甚至需索規儀經差朋分稍不遂意即以違悞供應聳官責比嗟此小民以有限之資本當無窮之官差大爲苦累嗣後槩行革除敢有仍蹈前轍一經訪聞官則飛章叅拿役則立提杖斃決不姑寬

一蘇州六門並楓鎮山塘米牙後手之宜禁也凡有舖戶買米奸牙卽串通船戶脚棍或說市語或打手式名曰通錢每石後手三分二分不等舖戶買米價值旣多自必零賣居民價值益昂嗣後米牙亦卽改悔若再蹈前轍該地方

官卽行嚴拿重懲

一蘇城富戶用大斛收租之宜禁也聞蘇郡租斛每石約大市斛一二斗不等若佃戶拖欠陳租凡值交租之時先扣一石五斗抵陳租一石如有不清或鎖留船隻或送官究比拖累不堪嗣後收租業戶必須公平斛收佃戶亦必須將好穀好米交租抵漕陳租照欠清還不必起息以後亦不許拖欠庶主佃兩安如違重究

一佐貳雜職之不許違例受詞也民間詞訟自有印官准理今查蘇府民俗動以此微小事赴佐雜衙門告理而不肖

州縣亦妄自尊大動輒批委典巡此等微員利慾薰心往往即為濫差拘擾借端勒索惟利是趨罔顧事之曲直深可痛恨嗣後敢再擅准濫批定即嚴行叅究

一捕役之勒賊誣良書役之舞弊濫差宜禁也蘇州五方雜處盜竊案件甲于他郡捕役偶獲一賊往往不即送官審訊先用非刑拷逼或從前有仇之人則囑令扳出以洩宿憤或某家殷實則教供指定異圖訛詐而蠹書舞弊每票籤疊出勾通差役百般索詐迨至審非正賊而良民之家早已先破似此惡捕蠹役言之深堪痛恨除現在密察拿究外嗣後該管各官務須嚴加訪查不得擅行濫差致滋民累如有仍前勒賊誣良濫差舞弊等事或經訪聞或被告發定即官叅役處決不姑貸

以上五條各宜剔除如執迷不悟一經訪拿後悔無及慎之慎之特示

爲嚴禁訟棍之撞騙以安良懦事照得南方風氣古稱柔弱而爭訟競勝最爲刁健每因睚眦小怨寸土微嫌即捏架大題牽告多人惟逞一朝之忿不惜千金之資隨有一等棍徒百計圖維或云某人向在衙門出入或云某人深與吏役契交官府諸事皆托傳通令備暮金浼其夤緣而鄉愚富宦正在角勝之時未有不墮奸計彼遂與不法胥役合成一局或摸擬案卷造作情形或搖動風聲假傳言語伊等通同巧飾痴愚信以爲真又復勾連他棍將此處出財緣由告知彼處令其心疑情急亦即多方鑽刺兩家

財物一夥鯨吞及至庭訊之後其在理正審贏者彼即稱  
官府用情應饋若干某人着力宜酬幾許指名公用總入  
私囊倘理枉審虛恐致識破反怨本人言辯不清情詞遺  
漏假施怨憤激其上控即使愚民頓悟而贏者已傾家蕩  
產輸者復焦頭爛額似此訟棍撞騙殊堪髮指除現在訪  
拿外合行嚴禁爲此示仰督屬軍民人等知悉嗣後勿得  
輕信棍蠹誘騙其不法棍徒亦速改悔斂迹倘再違犯或  
被訪聞或被告發定即嚴拿處死決不少爲寬貸各宜凜  
遵毋違

爲特示查報派累事照得私徵濫派禁例森嚴訪聞江省  
猶有大貼小貼等項名色曾經密劄通察在案旋據上江  
兩縣各報存有貼費四百九十八兩當因爲數無多且已  
自行呈出隨即從寬示革其句容縣每年派至二萬有奇  
又復欺朦率稟法難姑縱業經糾叅究處此三縣旣已如  
此他縣豈能盡除倘各員俱如句容之欺飾隱混必皆難  
逃法網合再出示察查爲此示仰督屬州縣場員官役人  
等知悉如有派貼等項作速據實呈出或可酌量寬其旣  
往并許里民赴轅呈稟倘仍執迷不悟或經訪聞或被告

發官則飛叅役則立斃本署院言出法隨決不姑貸爾里民亦不得藉端捏控致干反坐特示

為再示曉諭事照得各州縣里書坐差等役舞弊累民經本署院飭令概行勒石革除在案今聞下江各州縣以革去坐差錢糧無人催納革去里書每里實徵等冊無人造辦向日每畝派銀一二分乃冊書造費等語查各省州縣各有版籍文冊收掌在官每年開徵之先督令戶房照版籍戶名額賦或上年實徵及現年應推戶糧開造一冊名曰實徵即照實徵冊內戶次姓名銀米數目填寫滾單每單或十戶五戶滾單填就或給保甲分送或差衙役徑交俱止交與單內首戶聽首戶挨交次戶依式轉遞其各戶

已完者戶房即照串根完數填入實徵冊內有逾完半及全完之期者始行按限摘拿抗欠之戶若係滾單未到再喚卧單之戶併懲既不另用冊里等書亦不嘗用里差坐差其造冊填單紙筆飯食州縣于合封及串錢內酌量籌給並不派擾民間遞交滾單之人止到單內頭家交單即去不須再往次戶一人一日即可分遞數百餘單止有散單之責不當催糧之任若指單索錢立即拿究至單內首戶亦止轉遞滾單與次戶並不着令即催單內各戶錢糧以杜鑽充躲閃之弊此各省徵糧之大概於

國民兩有實濟者州縣官果能善為勸導則百姓不候滾單即照上年串票額數預先投納者更頗不乏人矣合再明白出示曉諭為此示仰官役軍民一體知悉共開茅塞官須實心徵輸民急早完納冊里等役冊費等項務遵前示永革勿為奸胥蠹役佈散流言動搖方寸仍遂其侵混錢糧擾害百姓之故智也特示

為嚴禁私販米糧出洋以重海疆以裕民食事照得江南地方海防最關緊要且內地生齒日繁惟賴米糧充裕若米糧出洋既資賊寇又妨民食屢奉

旨例嚴禁各官理宜留心本署院下車之始誠恐沿海文武員弁以及兵役人等仍敢希圖厚賄任其淌行資寇害民隨一面確察叅拿一面嚴飭申禁今訪聞果有不法奸商地棍牙行賄通汛防連檣巨艦私販入海瀏河口上海口一帶絡繹不絕以致沿海州縣民食缺少卽蘇松等處米糧亦多昂貴百姓力量有限家口嗷嗷待哺似此貽害吾民

三善堂內江示稿  
深堪痛恨除現在叅拿外合行示禁爲此示仰督屬官弁  
軍民人等知悉嗣後各該地方所產米糧止許內地糶賣  
不得私販出海各海口員弁兵役不時嚴加盤詰如有奸  
牙地棍違禁私販或裝賣別貨串通影射夾帶或假作官  
差通同押送出海立刻拿解本署院衙門以憑分別究處  
其崇邑採買有照米船驗明立即放行不得留難阻滯及  
藉端擾民倘巡查不力或仍前賄放資其海賊貽害民生  
一經訪實定將該管文武地方官以溺職指叅巡弁員役  
卽請

旨于彼地正法决不寬貸凜之慎之

為曉諭百姓早完錢糧印官府從民便事照得錢糧攸關  
國帑糧戶理宜急早投納印官務必順從民便向有分作十  
限之行殊阻淳良急公之心轉貽小民分納之累業經  
奏議停止又一錢以下小戶并大戶一錢以下之尾欠以及  
短封俱准交納制錢每銀一分准完大制錢十文如有情  
願完銀者無論小戶及大戶尾欠短封俱准完銀不必拘  
定亦經奉

旨依議欽遵通行在案茲恐民間未能周知仍按十限之期未  
得急早完半全納更恐貪狼官役因錢價昂貴槩勒交錢

大負

聖主惠愛元元至意合再出示通曉爲此示仰督屬官吏士庶人等知悉從前重耗私派里書坐差俱已革除凡有應納錢糧各戶務須踴躍投納旣不必仍按十限之例亦可不拘完半全完之期倘能急早輸將先期全完該地方官卽予嘉獎至一錢以上戶民自當完銀其一錢以下小戶以及大戶尾欠短封固許以錢代銀亦許以銀投納總聽民便無庸分限徵收官役倘敢違混勒索一經訪聞定行叅拿重治不恕特示

爲曉諭永遵事照得歲科考試原應在于郡城係知府提調乃江寧歲試分就句邑殊非體制况該府赴句提調離省動經月餘地方公事不無遺悞且合郡生童有周折跋涉之苦句邑里民又現受派辦考棚什物之累查江寧府城現有考棚向止科考今應將歲科兩試均歸府棚在合郡赴考生童道里適均旣免遠歷山城而知府得以就近提調于地方公事均屬妥便至句邑考棚房屋改充公用一切什物造冊令該府提貯備用所有句邑向來派備考棚什物各費永行禁革以甦民累本署院已經商准

撫二院并行據司府咸以均歸府棚恤士便民議覆僉同  
除移行查照併勒碑外合行出示曉諭爲此示仰江寧府  
屬上江溧淳六浦句容等縣文武生童軍民人等知悉永  
遠恪遵嗣後凡逢

學政歲科兩試均赴府棚應考倘句容有種市棍劣衿止  
圖私已便利架捏阻撓生事該府縣立即嚴拿解轅以憑  
大法懲治不貸特示

爲嚴行飭禁事照得鄉約之設原爲朔望宣講

上諭勸導愚氓民間偶有爭競微嫌分當排解要必擇其老誠  
端方之人充當庶于地方有益本署院訪得徽郡各屬充  
當鄉約皆係市井無賴滋意騙害小民已非一日猶慮地  
方官查懲不敢大肆其惡近因在于生監中選報約正若  
輩即勾串不端之劣衿代爲營謀承充污穢氣投狼狽爲  
奸貪鄙心同朋比濟惡凡民間戶婚田土之事偶有爭論  
即羅攬投獻約正名雖調處實行賄賂稍不遂意卽顛倒  
是非公呈稟官而地方官碍于生監情面每不深究甚至

王華堂河江示稱  
徽府山城週圍不過里許鄉約添至四十餘人俱皆違例  
僭戴金頂混穿補服朝衣聚飲閭閻側目良懦不安本應  
按名拿究姑念已往免究除行徽州府并飭所屬嚴查從  
前勾充約正鄉約之劣生市棍悉行革除另選端方老誠  
之士民承充外合行出示曉諭為此示仰紳士軍民人等  
知悉嗣後凡公舉約正鄉約務須遴選梓里素所推重堪  
為表率者呈縣充任不得扶同混舉如劣衿市棍仍敢鑽  
營濫充一經訪實定行嚴拿重處併將府縣指叅不貸特  
示

為曉諭事照得通飭州縣捐修塘汎原因修整損壞為費  
無多其新創增設仍准酌動公項又通飭府州收埋枯骨  
亦因無主棺骸暴露可憫其有主停寄之棺令其善為勸  
葬不許差擾節次檄示何等明切茲風聞蘇郡有養廉全  
修塘房之語揚郡有沿戶押逼抬埋之說此皆昧良官役  
奉行不善又造此無稽之言暗佈宣傳希圖阻撓卸責除  
確訪叅拿外合行出示曉諭為此示仰官吏軍民人等知  
悉各汎塘房哨船州縣務必速為修整齊全無主暴露棺  
骸各官務留心收瘞盡淨其有主寄頓之棺善為勸諭依

禮安葬若非山向不利之年民間亦勿久停倘有官役藉端生事及再佈浮言定行嚴叅倍處特示

爲再行嚴禁永除民累事照得里蠹徇私派貼奸役假公勒費深爲民累本署院業經飭禁在案今查得丹陽縣蘆課經承每歲需索坐簿色銀每冊書六兩又金壇縣歷年辦糧有整畝七十畝分立十甲設有里總輪值按照田畝出銀二分通計合縣一年共出銀七百兩又查該縣胥役戶房糧書經管錢糧冊籍每值歲底各畝里總餽送酬儀或數錢或兩許不等又查得丹徒縣各房吏書有徭總銀總漕總及經管蘆課等項名色每年取受里畝規費銀約計三百餘兩雖已據各經承在縣首出若不徹底搜剔明

示革除恐鄉民受其愚弄暗索陰獻是革弊雖嚴弊端仍在將來日久復熾在所不免合再出示嚴禁爲此示仰督屬軍民人等知悉將前項諸陋規悉行永革嗣後敢仍有不法里蠹勾串奸胥仍行暗派一經訪聞定卽嚴拿治罪爾等百姓亦當思本署院告誡至再至三總爲爾等籌畫豁累切勿受人欺朦自損脂膏慎之凜之

爲曉諭事照得米糧出洋例禁甚嚴本署院示檄交督原爲民食海防起見今訪聞蘇郡之楓橋齊門半塘橋以及吳江之平望鎮皆有米行其中多係串賣外洋貽害民生除現差文武員弁密訪察拿外合行示諭爲此示仰督屬軍民人等知悉如查有奸牙勾串私販轉運出洋真憑實據卽行赴轅密報定行從重獎賞如虛反坐各宜凜遵特示

為曉諭事照得澄清吏治首重實心實政剔除弊竇在察  
奸棍奸胥本署院下車伊始卽飭各屬訪拿指稱本署院  
舊識及藉稱訪事名色招搖撞騙種種不法之人一有見  
聞立卽解懲在案蓋以本署院從不差人訪事也近以揚  
商辦運不全壓網未楚屢飭趕運以清積案無非為

國計民生惜商除弊之至意也風聞楚中來有汪姓招搖生  
事之語除現在確訪拿究外合行示諭為此示仰兩淮各  
商知悉爾等上緊趕運速清自累獲益非淺毋得亂為棍  
徒搖惑既破銀錢又獲重懲一經質訊悔之何及至揚商

三善堂內江六種  
尚務鑽營尚好虛聲不知務本爭相逐末亦世傳之通病也合併示知切切毋違

為勸禁鬧房之惡習以厚風俗事照得閨門為王化之原結縭乃夫婦之始正宜禮重其事奚容稍有褻慢乃聞下江之鎮揚各屬上江之徽寧等府凡有嫁娶于新婦入房合卺甫畢之際不論尊長卑幼親串友朋群入房中嘲笑至再方始散去名曰鬧房又曰鬧新娘不特士庶編氓相習成風卽縉紳鄉宦亦恬不為怪更有妄誕之說以鬧房之盛否卜家道之興廢幻談動衆尤為駭異合亟出示勸禁為此示仰縉紳士庶諸色人等知悉似此惡俗一經指示諒亦頓為醒悔若不速為改除先勸後懲勿謂言之不

早特示

為勸禁事照得蘇郡五方雜處陋習多端本署院訪有數  
條大關風化民生者合行臚列示禁

一蘇城素愛紛華民耽逸樂本署院曾經示勸近聞屬吏紳  
士已知收斂而無知愚氓猶然放縱傾家揭債徒顧目前  
大非所宜嗣後務須一體改悔痛自屏除克勤克儉以冀  
家給人足婦女入廟燒香一事更宜止息再違必究

一蘇城朱家園西察院等處飯舖間多窩娼其閭門外酒船  
亦暗藏妓女嚴禁之後再犯拿究

一蘇郡有等囤戶見窮人家女兒卽行謀買在家蓄養貪得

多金賣與遠省爲妾爲婢離人骨肉陷人終身莫此爲甚  
嗣後務要改圖別業敢有再犯重宄不貸

一蘇郡茶館酒肆嘗以婦人當爐掌柜又有一種少年子弟  
名曰大清客小清客不務正業鬧館闖街團聚生釁自此  
以後各宜洗心斂跡以厚風俗

一蘇州牙行串同舖飯吞騙客賬羈累遠商又有種奸徒串  
同牙行將不堪貨物放賬值一兩者擡至二兩小民窘迫  
賒來轉賣以濟急需而若輩又用賤價另使他人買回如  
此轉折博利小民力不能還者即以客本大題告官拖累

不堪訟獄日繁自禁之後務須改悔倘有再犯定卽繩以  
大法

以上五條本署院知之最稔何難立拿置之重典但不忍不  
教而誅通行曉諭冀其改過遷善共爲

盛世良民敢再怙惡不悛或經訪聞或被告發刑罰隨之噬臍  
何及衙蠹地棍不得藉此生事各宜凜遵特示

三華堂內江示稿  
為嚴行飭禁事本署院察勘海塘行舟過松訪有松郡應  
行嚴禁數條開列于後

一保甲之設原以稽查匪類乃松屬保甲甚屬廢弛以致地  
方漫無稽察積匪肆行嗣後務要上緊編查奉行實力

一訟師最為民害司民牧者理宜隨時查察嚴拿重究今松  
城不法之徒窩養訟棍逞刁害民嗣後務要嚴拿重究以

### 安民業

一松屬濱海民多刁悍每有土豪好勇鬪狠遇事糾眾打降  
傷人斃命嗣後務宜嚴行查禁倘有此等惡棍立拿詳報

繩以大法

一松屬民間多藏鐵梭鐵尺尖刀拳心鷄叉金剛圈等項器  
械每遇鬪毆持此傷人嗣後務宜嚴禁有即繳報銷燬倘  
再私藏查出定即治以私藏軍器之罪並禁鐵匠不許打  
造有犯連坐

一匿名揭帖久奉嚴禁今松郡積習每每造揭污人嗣後務  
要嚴行訪拿依律懲治

一松屬權操衙蠹任意作奸而該道之役傳聞尤甚嗣後道  
府縣等務要上緊稽查嚴拿詳究倘再漫不經心經本署  
院專檄飭提定將該管官一併嚴叅不恕

以上數條本署院訪聞最悉姑念同爲赤子出示嚴禁倘再  
愍不畏法仍蹈前轍察出定即置之重典決不寬貸如衙  
蠹地棍藉此復敢訛詐生事亦即重究不恕慎之特示

為敬陳徵糧事宜等事案准

戶部咨前事雍正十一年二月初九日奉

旨大學士鄂張議奏欽此查完糧在一錢以內者每多戔

頭折耗若准納制錢于民甚便催徵亦易應將一錢以下

之小戶每銀一分准完大制錢十文每銀一釐准完大制

錢一文再查大戶每因不能恰合零數遂成尾欠花戶以

所欠無多遷延時日及至差催使費多至數倍應將尾欠

並短封概完制錢如有情願完銀者亦准完銀不必拘定

等因于雍正十一年六月初三日奏本日奉

旨依議欽遵在案前據藩司詳請就地增減前來是無一定章程倘府縣通同徇隱臆爲增減朝更暮改尤易滋弊查定例每釐收錢一文正與雍正七年欽奉

上諭所定錢價並各省搭放兵餉之例相符零星小戶數僅一二分雖欲增減絲毫似難逐戶分晰反致瑣碎累民自應

查照大學士鄂 張 原奏奉

旨通行之數畫一欽遵未便更張等因批示復廣爲諮訪留心體察去後本署院查江西未奉定例以前各處委官清查積欠亦多聽從民便每銀一分連加一耗收錢十一文今

訪得廣昌縣雍正八九年該府委員將大戶小戶一概收錢連加一耗七釐飯食并挑脚等費每兩收錢一千一百

五十文又各府及署府丞倅中亦有因循陋規縱容家人書辦勒索印串禮每次一二兩不等又州縣錢糧徵冊並不逐日銷欠有已經完清而戶名互異糧數多寡不符無從掛銷戶書巧立算帳禮名色將糧多大戶措勒二三錢至四五錢不等未遂其慾即朦官籤拿名曰對數改銷刁難措索又銀匠利于小戶完銀希圖煎銷確耗戩頭火工之費今因小戶收錢無可咀嚼指火工名色將大戶每兩

勒索二三分不等似此種種需索尤屬病民合亟通飭嚴禁爲此示仰督屬官吏軍民人等知悉嗣後零星小戶并大戶尾欠數止幾分幾釐者遵照

廷議每銀一釐准收錢一文其一錢以上大戶不准收錢倘小民不欲完錢聽其自便如有不肖府縣不遵定例仍前將大戶一概收錢或縱容家人書辦勒索印串陋規以及州縣戶書措勒索帳禮銀匠額外多索火工等弊一經本署院訪聞官則嚴叅究審書役立即拿解追擬斷不寬貸各宜凜遵毋違特示

爲嚴禁銷燬制錢上裕

國寶下資民用事照得制錢爲民間日用必需之物疊奉

上諭嚴禁銷燬諄切周詳本署院前因西省既有滇錢搭放兵餉又復鼓鑄何以大制錢未見流通充裕訪聞大制錢價賤故多銷燬打造并遠方販去而省會止用小錢奸舖攬和私錢古錢便于壟斷高擡向年每千文價止六錢三四分今市價日昂貴至七錢七八分甚屬病民先經檄飭藩司查議去後茲據新建縣詳報拿獲向庚生張國祥等將制錢剪邊打造黃銅器皿其中間錢心依然賣與錢店每

弔換好錢八百文等情又檢查上年各縣摺報市價大制  
錢每千文市戲紋銀一兩三分等語較之每弔錢心換好  
錢八百文其價相彷彿可見大錢價賤小錢反貴銷燬之弊  
未必不由于此查江西用小錢之處甚多省會之區且有  
剪燬打造公行貨賣之人則外府山僻州縣自必更甚文  
武各官身在地方平日並不留心訪拿殊屬玩忽合行通  
飭嚴禁爲此示仰督屬官吏軍民人等知悉嗣後城鄉市  
鎮凡屬打造銅器皿之店責成保甲隣佑加意稽查准其  
密行首報如果審實該府縣即將首報之人獎賞倘敢容  
隱不首一經訪拿嚴審保甲隣佑有無知情故縱分別治  
罪自示之後及早回頭保全身家性命保甲隣佑留心稽  
查毋致代人受過本署院諄諄告誡如執迷不悟發覺之  
日從重究處後悔無及矣凜之慎之特示

為特行查禁事照得各處關津渡船原為便民而設訪聞  
江西省會之小池口楊柳渡山下渡沙井贛縣之黃金渡  
楊梅渡歐潭渡濃樹下王母渡或遇麥豆米穀恃強打降  
按籬抽取或遇江濶水漲船戶貪心滿載乘風冒險雖有  
佐雜稽查之名究無奉行之實現據彭澤縣報稱十二月  
十二日小孤汛渡船裝載洲民覆舟淹斃九人撈起凍死  
二人船戶朱畢貴一併淹死堪為冒險者戒又山僻溪河  
向有義渡租田春夏水漲設渡秋冬水涸搭橋以便行人  
每為流僧衿棍掌管侵漁不歸實用以致渡船朽壞不修

橋木欹危不整又各處浮橋向有里民樂輸大修小修經費繳官修理而不肖官役通同冒銷有名無實種種弊端深為痛恨合行出示嚴禁為此示仰所屬官吏軍民人等知悉嗣後凡屬官渡無許任意指索渡錢強抽麥豆米穀以及冒險滿載致有覆溺之虞省會巡查官役務貴實力奉行嚴查究懲不得虛應故事至外府州縣所有義渡租穀并修橋經費該府縣身在地方平日自當留心查禁不時修整務期渡橋利濟毋致糜費侵漁勿謂事非命盜重情遂不經心然奉行之虛實即此以覘政治之賢否本署院雖相隔寫遠事無巨細刻刻留心體察一經訪聞官叅吏處衿棍嚴行拿究斷不寬貸特示

爲嚴禁平糶積弊以濟民食事照得民生要務糧食爲重  
青黃不接平糶之法尤貴實力奉行稽查有方始有裨益  
伏讀

上諭先事圖維務期小民得沾實惠本署院仰體

聖天子愛養元元至意扎檄疊行三省藩司加意體察或于糶  
三之外破例多賣以平市價以濟民食并嚴禁各處牙販  
囤積擡價病民留心懲治在案今訪得西省積弊數條再  
行刊示通飭嚴禁倘道府州縣罔恤民瘼虛應故事官則  
嚴叅治罪役則立拿杖斃凜之慎之特示

計開

一青黃不接之時市價理應據實開報酌減平糶訪聞各州縣恐糶多難于買補或希圖餘剩先將市價浮開又將糶價高擡似此存心巧詐現在密訪嚴叅

一平糶固係出陳易新其穀必須乾圓潔淨訪得各州縣將倉面倉底氣頭鼠食殘壳糠粃并陰雨漏濕霉變浥爛之穀攙和糶賣以致小民不沾實惠似此劣員現在密訪叅究

一平糶之升斗多有不足或由州縣私置或由斗級重攬以致虧短應令各該府躬親較驗印烙發行該道仍不時密訪查究

一城市米舖每于平糶之時不惟勾通書役冒稱鄉民分填多票買糶數石數十石礮米發賣抑且買通家人將殘票重照偷賣倉穀數十石百餘石昏庸之員毫無覺察該府道訪拿詳究

一州縣遠鄉大鎮大墟之處各宜分運發糶以免小民跋涉亦可杜城市米舖買糶之弊其脚費該縣於買補盈餘內詳明撥補

一買糴人多該州縣即當于四關內外分設三五廠委佐雜  
教職監督賣票分敷量穀以免擁擠守候

一零星小戶買糴一二斗三四斗者或尾數幾毫收錢一文  
逐戶併積原有盈餘或足百足串易銀之時扣存串底亦  
多羨餘不在多收之列該州縣據實開報以充書役斗級  
扒夫人等飯食刷票紙筆之費以公濟公凡小民買穀向  
有票錢三五文及斗級扒夫一切使費嚴行禁革毋許仍  
前需索現在訪拿重處

一上年被災各縣並現今市價有每米一石需銀一兩以上  
之處不獨糴三之外宜破例多賣即所糴之價尚須通變  
遞減俾市價日漸平減小民方沾實惠該司道府身在地  
方各宜留心體恤督率各州縣尤貴加意訪察務除積弊  
方為實心辦事

以上各條專責各知府巡道就近悉心稽察倘漫不經心一  
經本署院訪聞定將道府一併嚴叅不貸

爲嚴禁囤積高擡阻運租穀以濟民食事照得本署部院  
念切民瘼留心諮訪聞得南贛接壤之三江口向有奸販  
串通奸牙把持截買囤積糧食各處米舖又復朋比爲奸  
如遇靈雨連綿則齊行議價停礮歇碓撒水攙和糠沙壟  
斷高擡樟樹市以南昌省會新建吳鎮臨川金谿等處亦  
多類此又寧州等處山僻州縣一班無賴棍徒每于青黃  
不接之時假公濟私赴道府州縣公呈巧以禁販爲題實  
爲賣販張本將商販大船米穀得錢私放業戶庄田租穀  
攔阻不准運回甚至各處佃戶比比效尤不獨拖欠租穀

抑且結黨鄉禁將田主租穀勒令本庄糶賣以致置產輸  
賦之家反受有糧無租之累守令身在地方一味悠悠忽  
忽既不能移風易俗于事前又不能釐奸懲惡于事後由  
此棍惡肆行刁風愈長種種病民殊堪髮指合行嚴禁為  
此示仰督屬官吏軍民人等知悉民間習俗之轉移固由  
守令之設法化導然守令政治之勤惰全賴司道之整飭  
獎勸上下同心協力自必漸有成效嗣後各處米行有無  
牙販串通囤積糧食米舖有無齊行高擡市價事關民食  
巡道知府各于城鄉市鎮不時留心訪察嚴行禁止查拿  
詳究至地棍借名禁販把截四鄉河道奸佃欠租阻運種  
種情弊責成守令先示遍行教戒有犯立即通詳執法痛  
處本署部院現在密訪如道府州縣等官仍前廢弛吏治  
玩視民瘼惟有白簡從事斷不少為寬假至奸販奸牙刁  
棍刁佃從此勿萌故智務各急早回頭保全身家性命倘  
猶執迷不悟怙惡不悛定行專員鎖拿解轅分別按律治  
罪噬臍無及各宜凜遵毋違

